



14. august 2026

UKA 2026/262

Inatsisartut ingerlatsinermut maleruaqqusaanni § 36 tunngavigalugu apeqquteqaat aallaavigalugu oqallisissiamik imaattumik siunnersuuteqarpunga:

Apeqquteqaat aallaavigalugu oqallisissatut siunnersuut, qanoq ililluta inuusuttut ajornannginnerusumik sunngiffimmi sulisissinnaanerigut.

(Inatsisartunut ilaasortaq Karen Marie Kyed Frederiksen, Demokraatit)

Inuusuttut amerlavallaat, sunngiffimmi sulinissaminnut ajornakusoortinneqartarput. Tamanna uggornarpoq. Inuusuttummi amerlasuut sulerusukkaluarput. Namminneerlutik aningaasarsiorusukkaluarput. Akisussaaffimmik tigusinissamik misileerusukkaluarput. Aamma suliffeqarlutik misilittagaqarusukkaluarput. Tamanna inuiaqatigiittut ilungersunartutut tigusariaqarparput.

Demokraatit isumaqarput, sunngiffimmi sulineq inuusuttup inuuneranut pingaarutilerujussuusinnaasoq. Aningaasarsiat kisiisa pinnagit. Akisussaaffeqarnek, piiffissaq eqqorlugu takkussinnaaneq, suleqateqarnek, imminut tatigineq aammalu paasinnissinnaaneq, nammineerluni periarfissanik pilersitseqataasinnaaneq pillugit. Taakku tassaapput misilittakkat, inuusuttup ilinnialernermini, sulinermini aammalu inersimasunngornermini, nassatarisinnaasai.

Naalakkersuisut akissutiminni § 37-apeqqummut normu 197/2025-imut nalunaarput, naalakkersuisooqatigiit liniutigerusukkaat, meeqqanut inuusuttunullu sunngiffimmi suliffeqarnissap pisariinnerunissaa, alloriarnek pingaartuummat kingusinnerusukkut suliffeqalernissamut. Naalakkersuisut aamma ilisimatusarnek innersuuppaat, takutitsimmat, inuusuttut siusissukkut suliffeqalersimasut, ilimanaateqarnerusarmata, ilinniagaqalernissaat aammalu suliffeqaannarnissaat¹.

Pissut pingaarutilik.

Sulisussanik amigaateqarnerput oqaluuserikkajupparput. Oqaluuserisarparput pisariaqartitsisoqartoq, inuusuttut amerlanerit ilinniakkaminnik naammassinnissimanissaat. Oqaluuserisarparput, amerlanerit akisussaaffimmik tigusinissaat inuiaqatigiinnullu tapertaanissaat. Taamaattumik tamanna isumaqanngilaq, inuusuttut, sulerusuttut, mattunneqarpata.

Ilumoorinnaanngilaq, inuusuttut 18-nit inorlugit ukiullit itigartitaajuartassappata, sulisitsisut malittarisassat paasiuminaatsinneri pissutigalugit imaluunniit akisussaaffimmik tigusinissaminnut sapiissuseqanngimmata. Ilumoorinnaanngilaq, uagut inuiaqatigiittut inuusuttunik akisussaassusilinnik perusussasugut, akisussaaffimmillu misilittagaqarnissaannik tuninissaannut naallerarlugit.

¹ § 37-imut apeqqummut nr. 197/2025-mut akissut



DEMOKRAATIT

Demokraatit soorunami isumaqarput, sunngiffimmi suliffeqarneq pitsaasunik sinaakkuteqarluni ingerlassasoq. Inuusuttut illersorneqassapput. Sulineq toqqissisimasuussaaq. Atuarfik siulliujaannassaaq. Malittarisassalli pitsaasut pisariaqanngitsumik naalleraataassanngillat. Oqimaaqatigiinneq eqqortoq nanissavarput.

Sunngiffimmi suliffiit arlallit inuusuttut imminnut upperinerannik tunisisinnaapput. Kajumissusaannik annertusaataasinnaavoq. Sulinerup pitsaanagerusumik paasinissaanik tunisisinnaavoq. Aammalu inuusuttut suliffeqarfiillu akornanni annertunerusumik ataqatigiinnermik pilersitseqataasinnaalluni.

Suli pingaaruteqarneruvoq nunami nunatsit ittimi, pisariaqartitsigatta, inuusuttut amerlanerusut siunissami sulisussatut imminnut isiginissaat.

Taamaattumik kissaatigaara, Inatsisartut Naalakkersuisullu ukununga apeqqutitut isummernissaat:

- Qanoq ililluta tigussaasumik pisariinnerulersissinnaavarput inuusuttut 18-nit inorlugit ukiullit sunngiffimmini sulisinnaannissaat, toqqissisimaneq, suliffimmi atugassarititaasut aammalu atugassarititaasut pitsaasut innarlinngikkaluarlugit?
- Qanoq ililluta Naalakkersuisut, kommunit, atuarfiit, namminersortullu akornanni pitsaanagerusumik suleqatigiinnermik pilersitsisinnaavugut, taamaasillutik inuusuttut amerlanerit siullermeerlutik suliffeqalernissaannik periarfissinniarlugit?
- Qanoq ililluta qulakkeersinnaavarput, malittarisassat akisussaaffillu ima ersarissisinnaallugit, sulisitsisut inuusuttut nalorninerinnarmikkut itigartittannginnissaannut?

Demokraatit isumaqarput, inuusuttut periarfissanik tuniorarneqartariaqartut. Inuusuttoq sulerusuppat, ilinniagaqarusuppat akisussaaffimmillu tiguserusuppat, uagut inuiaqatigiittut tapersersortussaavarput.

Qilanaarpunga, qanoq partiit allat Naalakkersuisullu isumaqarnerat paasissallugu, neriullungalu angusaqarluartumik oqallittoqassasoq, qanoq ataatsimoorluta inuusuttut sunngiffimmi suliffeqalernissaat pisariillisarsinnaaneripput.